

7-Keys.

Keys bayoni: Vijdon haqida. Bir kuni o'qishdan xursand keldim va: -Oyijon, men bugun ikki bahodan saqlanib koldim,-dedim. -Nimadan?-so'radi onam. -Fizikadan ikki baho olishdan,-bo'lgan hodisani oyimga tushuntira boshladim. Bilasizmi? Bugun nazorat ishi o'tkazildi. Men masalani yecha olmadim va varaqni o'qituvchiga topshirmadim. Keyingi darsda masalani oxirigacha yechib bo'ldim. Tanaffusda esa laborantdan varag'imni sinfimiz nazorat ishiga qo'shib qo'yishni iltimos qildim. Hayriyat, mo'ljalim amalga oshdi. Nihoyatda xursandman, oyijon! -Sen xursandmisan?-takror so'radi onam. -Albattada. Besh olsam kerak, axir men hammasini to'g'ri ishladimku,-dedim. -Vijdoningchi. U qiynalmayaptimi?-xo'rsinib so'radi onam. Men nima deyishga hayron bo'lib sukut saqlardim. -Agar men sening o'rningda bo'lganimda o'sha ikkini olib vijdonimning pokligicha qolgan bo'lardim. -Axir... , -men o'zimni oqlamoqchi bo'lgan edim, onamning tikilib qarashidan nafasim ichimga tushib ketdi. Biroz o'ylanib: -Endi nima qilsam bo'larkin?-dedim. -Vijdoning nimani buyursa o'shani qil. Ba'zan uning mavjudligini eslab turish ham foydadan holi emas,-deb boshqa xonaga chiqib ketdi. Men o'zim tanho qolib, birinchi marta o'ylay boshladim: vijdon degani nima o'zi? Lekin aniq ta'rif topa olmadim. Men uni ich-ichimdan his etib turardim, lekin so'z bilan ifodalashga ojizlik qilardim. Kitob javoniga borib, entsiklopedik lug'atni oldim, kerakli betini ochdim va o'qiy boshladim: «Vijdon-bu o'z hatti-harakatlari, hulqi uchun jamiyat oldida javobgarlikni his etishdir». Shu onda onam kirib: -Voy-bo'y, qizginam! Sen hali vijdonni lug'atdan qidirib yuribsanmi? Ahvoling bundan ham xarob bo'lishi mumkin emas. Kitobni joyiga qo'yib, ovqatlangani o'tir. Bir necha vaqt o'tgan bo'lsa ham, ovqatga qo'l urmay o'tirar edim. Meni nimadir qiynardi. -Seni bu qilig'ingdan biror o'rtog'ingni xabari bormi?-so'radi onam. - Hech kimni... -Hayriyat, o'rtoqlaring ham senga o'xshaganmi, deb o'ylagandim... -Endi nima qilsam ekan? -Aytdim-ku,-vijdoning amri bilan ish tut. O'qituvchini aldading, laborantni esa noto'g'ri yo'lga boshlading. Bular haqida o'zing yaxshilab o'ylab ko'r. Men seni to'g'ri yo'l tanlashingga ishonaman. Ertasiga men kollejga dars boshlanishidan ancha oldin keldim. Fizika o'qituvchisini sabrsizlik bilan kuta boshladim. Kelishi bilan unga bo'lgan voqeani aytib berdim. U meni tinglab bo'lib: -Men esa nazorat ishlarini tekshirayotib, bu varaq qanday paydo bo'lganiga hayron bo'ldim. Axir men varaqni topshirmaganligingni bilardim.

Keys savollari:

1. Farzandning qanday hislatlari onani tashvishlantirdi?
2. Bu pedagogik vaziyatda farzandning his-tuyg'ularni tahlil qiling.
3. Onaning qanday xarakatlari farzandi to'g'ri yo'l tutishiga imkon berdi?